



REPUBLIKA E SHQIPËRISË
Komisioneri për Mbrojtjen e të Dhënave Personale
Komisioneri

Nr. 4284/3 Prot.

Tiranë, më 20/2/2013

Lënda: Urdhër për Kontrolluesin "Gjykata e Rrethit Gjyqësor" Tiranë.

URDHËR

Nr. 06, datë 20/02/2013

Mbështetur në ligjin nr. 9887, datë 10.03.2008 "Për Mbrojtjen e të Dhënave Personale" Vendimet e Kuvendit të Shqipërisë nr 211, datë 11.09.2008 "Për zgjedhjen e Komisionerit për Mbrojtjen e të Dhënave Personale" dhe nr 225, datë 13.11.2008 "Për miratimin e strukturës organike dhe kategorizimit të pozicioneve të punës të zyrës së Komisionerit për Mbrojtjen e të Dhënave Personale", pas shqyrtimit të relacionit të Drejtorisë së Hetim-Inspektimit në ngarkim të Kontrolluesit "Gjykata e Rrethit Gjyqësor" Tiranë.

KONSTATOVA

Në zbatim të urdhrimit nr. 14 datë 08.01.2013 të Komisionerit për Mbrojtjen e të Dhënave Personale, në kuadër të trajtimit të ankesës të datës 26.12.2012 të shtetasit A.A drejtuar Komisionerit për Mbrojtjen e të Dhënave Personale, u krye inspektimi administrativ pranë kontrolluesit "Gjykata e Rrethit Gjyqësor" Tiranë me objekt:

- Verifikimi i ankesës së shtetasit A.A drejtuar Komisionerit për Mbrojtjen e të Dhënave Personale e cila lidhet me mbrojtjen e aksesit në të dhënat personale gjatë shpërndarjes së fletë-thirrjeve (të shoqëruara me kërkesë paditë) të shtetasve pranë kësaj Gjykate.

Kontrolluesi "Gjykata e Rrethit Gjyqësor" Tiranë në funksion të kryerjes së detyrues së tij bazuar në Kodin e Procedurës Civile nenet 128 e vazhdim, realizon thirrjen e personave me anë të nëpunësit gjyqësor. Thirrja në gjykatë bëhet me letërthirrje e cila përmban të dhëna personale si: emrin, mbiemrin e personit të thirrur, kohën e vendin e seancës gjyqësore, mosmarrëveshjen për të cilën thirret, si dhe pasojat ligjore në rast se personi i thirrur nuk paraqitet në gjykatë. Letërthirrja dhe dokumentet që shoqërojnë atë (kërkesa, kërkesë-paditje) shpërndahen dhe dorëzohen të hapura (jo të mbyllura ne zarf) nga punonjësit e Kontrolluesit.

Komisioneri për Mbrojtjen e të Dhënave Personale vlerëson se, nga aplikimi i kësaj procedure aksesi në të dhënat personale të subjekteve që mbarten në këto dokumente

realizohet lehtësisht nga persona të tretë (*fajinjët, punonjësit qendrës së punës ku punon i thirruri apo edhe ato të vendbanimit të tij*), duke shkaktuar një cënim flagrant të të drejtave të subjekteve të të dhënave personale duke shkelur privatësinë e këtyre subjekteve.

Kontrolluesi gjatë aktivitetit të tij ligjor duhet të garantojë të drejtat dhe liritë themelore të njeriut dhe në veçanti të drejtën e ruajtjes së jetës private, e drejtë e cila është e mbrojtur nga neni 8 i Konventës Evropiane për *“Mbrojtjen e të Drejtave dhe Lirive Themelore të Njeriut”* si dhe ligji nr. 9887 datë 10.03.2008 *“Për Mbrojtjen e të Dhënave Personale”*.

Komisioneri për Mbrojtjen e të Dhënave Personale vlerëson se duke mos marrë masa për të mbrojtur aksesin në të dhënat personale të subjekteve që thirren për të marrë pjesë në proceset gjyqësore, shkelet privatësia e këtyre subjekteve të të dhënave personale. Shpërndarja e letërthirrjeve dhe dokumenteve gjyqësore (*kërkesa, kërkesë-padi etj*) të hapura nuk mbron të dhënat personale të subjekteve që marrin pjesë në proceset gjyqësore.

Kontrolluesi *“Gjykata e Rrethit Gjyqësor”* Tiranë gjatë procedurës së shpërndarjes së letërthirrjeve dhe dokumenteve gjyqësore (*kërkesa, kërkesë-padi etj*) të hapura është në shkelje të:

- Ligjit nr. 9887 datë 10.03.2008 *“Për Mbrojtjen e të Dhënave Personale”* neni 2... *“Përpunimi i ligjshëm i të dhënave personale bëhet duke respektuar dhe garantuar të drejtat dhe liritë themelore të njeriut dhe në veçanti të drejtën e ruajtjes së jetës private”*.
- Ligjit nr. 9887 datë 10.03.2008 *“Për Mbrojtjen e të Dhënave Personale”* neni 27/1.... *..“Kontrolluesi ose përpunuesi merr masa organizative dhe teknike të përshtatshme për të mbrojtur të dhënat personale nga shkatërrime të paligjshme, aksidentale, humbje aksidentale, për të mbrojtur aksesin ose përhapjen nga persona të paautorizuar, veçanërisht kur përpunimi i të dhënave bëhet në rrjet, si dhe nga çdo formë tjetër e paligjshme përpunimi”*.
- Udhëzimit nr. 15 datë 23.12.2011 të Komisionerit për Mbrojtjen e të Dhënave Personale *“Për Përpunimin dhe Publikimin e të Dhënave Personale në Sistemin Gjyqësor”* Kreu III *“Masat e sigurisë së të dhënave personale dhe konfidencialiteti”*.

Sa më sipër:

Në zbatim të neneve 29, 30 dhe 32 të ligjit nr. 9887, datë 10.03.2008 *“Për Mbrojtjen e të Dhënave Personale”*, si dhe nenet 107-109 të K. Pr. Administrative ;

URDHËROJ

1. Në zbatim të nenit 27 të ligjit nr. 9887 datë 10.03.2008 *“Për Mbrojtjen e të Dhënave Personale”* dhe Udhëzimit nr.15 datë 23.12.2011 të Komisionerit për Mbrojtjen e të Dhënave Personale *“Për Përpunimin dhe Publikimin e të Dhënave Personale në Sistemin Gjyqësor”*, Kreu III *“Masat e sigurisë së të dhënave personale dhe konfidencialiteti”* :
 - Të pezullohet menjëherë shpërndarja e letërthirrjeve dhe dokumenteve shoqëruese për subjektet që marrin pjesë në proceset gjyqësore sipas procedurës aktuale (*të pa mbyllura ne zarf*).

- Të merren të gjitha masat e duhura teknike dhe organizative për mbrojtjen e aksesit në të dhënat personale të subjekteve që marrin pjesë në proceset gjyqësore, gjatë procedurave të shpërndarjes të letërthirrjeve dhe dokumenteve gjyqësore (*kërkesa, kërkesë-padi etj*), duke bërë mbylljen në zarf të tyre për secilin subjekt.
- 2. Për plotësimin e këtij detyrimi të njoftohet me shkrim pranë Komisionerit për Mbrojtjen e të Dhënave Personale.
- 3. Në rast mospërbushje të këtyre detyrimeve, Komisioneri vepron sipas nenit 30, pika 2 të ligjit nr. 9887 datë 10.03.2008 “*Për Mbrojtjen e të Dhënave Personale*”, sipas të cilit... “*Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të rekomandimeve të tij, vepron sipas nenit 39 të këtij ligji dhe e denoncon publikisht ose e raporton çështjen në Kuvend dhe në Këshillin e Ministrave*”.
- 4. Ky urdhër hyn në fuqi menjëherë.

KOMISIONERI

FLORA ÇABEJ (POGAÇE)

